

四庫全書

集部

欽定四庫全書

文簡集卷二十一

明 孫承恩 撰

七言古詩

送大宗伯張陽峰赴南都

潞河水融春水濶張公早向燕臺發嘉會恭承秩宗命
行旌遙指秦淮月張公早歲登玉堂南金大貝聲輝煌
期以勛名接伊呂豈止文字追班揚育才成均贊邦禮

晉貳銓衡相天子天子式重留都情作朕彤伯須公行
明時三禮公所諳要使多士觀儀刑公也昔在留都仕
大作雄篇懸玉署興來還復玉署過亭外琅玕好題句
鳳皇臺畔芳草深白鷺洲邊波躍金時清事簡足登眺
不妨併入陽春吟大賢身繫蒼生望輔世年齡正強壯
須知南轍非久留行矣白麻催入相

題赤壁圖

空江水落江水平絕壁嵯峨橫赤城秋高夜間風露清

桂楫蕩漾浮空明玉堂學士峨眉英俯仰獨懷千古情
洞簫低回山月落長歌激烈魚龍驚緬思人世幾興廢
漫為水月評虛盈曹劉事業久灰燼兩賦光芒輝日星
江山終古只如是歲月期我來無停何當載酒訪遺跡
試聽橫江孤鶴鳴

呂梁行寄碧山張水部

長河北來勢洶洶呂梁洪頭石礧礧奔衝蕩嚙自悍激
到此那能不神悚一從禹王開鑿勤萬年常覩聖功存

迴濤障瀾自今古
鼎鼎森列雄乾坤
平原汗漫川靡靡
疏滌臣勞亦堪紀
神都翼翼儼天上
驛傳侯荒總經此
我明朝貢通萬邦
舳艫千里遙相望
天馬已聞自西域
明珠復見來炎方
天馬明珠自珍異
常賦由來重邦計
吳鹽越米時經行
賈舶商舟日來去
什百牽挽勞夫丁
一唱千和無停聲
頃刻波濤不相若
舟中往往呼神靈
我來正值淮水溢
濁流渾渾盤渦折
春撞震蕩驅萬牛
舟行遡流論丈尺
炎風吹日煙埃黃
舟人舵師汗流漿

却望茲洪若天塹使我未到心憂惶豈知及茲水平緩
淵淪無復嵯峨見故人相候慰行役令我寂寞開笑臉
天風助我吹征帆日落已見徐州山安流幾折復湍急
愁看孤舟偃當側人生憂喜准莫擬始信從來行路難

海隅歌

勾吳之墟東海頭戚子為卜村居幽海上風物自軒豁
回溪隱洑那知愁更有此地堪藏脩海氛四時襲衣屨
滃霧流雲滿庭戶蕩漾初看水色動熹微已覺扶桑曙

方壺圓嶠空沉沉安期羨門何處尋秋風快覩鵬翼奮
月夜獨和蛟龍吟莊生已辨逍遙遊乾坤仰止宣尼桴
潮生潮落自旦暮靜觀元化同悠悠戚子近官山水邑
睠懷舊廬心為惻政成他日賦歸來應長珊瑚幾許尺

題畫鷹

豪鷹側目如胡兒乘風來自西極西迴旋天地盪雲壑
下視孔翠真卑棲旭日翻江海濤洶中有孤峯勢龍從
獨立四顧殊自矜整翮當風更軒勇君不見深林邃谷

阻且幽下有狐兔上鵙鷁彈壓使之不得逞竊伏視汝
如仇讐勗哉青冥慎垂翅此輩顓顓正潛伺

題畫魚

生綃一幅潺湲出大魚小魚紛來集大魚昂藏如有神
鼓鬣震蕩排風雲欲隨飛龍破溟漲矯首一躍天池渾
小魚戢戢意自真偶依隊逐如相親至樂已聞濠上說
盈車未用詹何緝畫者亦好手觸處皆天機試觀此圖
大小總異態橫斜向背各各舍生姿黯黯煙霧起四壁

江風蕭蕭水欲立渚蒲汀芷紛交加不是五湖應七澤
我家茅屋湖之埂觀魚每愛臨深淵大魚撥刺小魚戲
俯仰意興何悠然竭來幾年墮塵網回首江湖空悵望
偶觀此圖心為翻逸思已落滄洲上吾聞北溟有魚名
巨鰲變化不測吞吐雲霧興波濤安得騎之逐李白揮
斥八極同遊遨

海天春曉歌

為桂洲題

晴天海日出宛宛陽谷東曙色淡熹微漸次開瞳矐扶

桑析木蕩光彩晶熒下射海水紅金蛇爍萬道翠蓋搖
千里天吳象罔伏不動微茫灝氣浮冲融三山露出青
芙蓉璇臺貝闕金銀宮珊瑚木難映水底瓊枝瑤草煙
葱蘢大鵬晞翼候搏奮蟠桃結實生華風島夷番舶互
隱見鯨波浩渺天河通泰和氣象不易見髣髴貌入斯
圖中固知畫者好手筆高齋懸對開心胸恍疑潺湲瀉
巖壑似有雲氣流冥濛不須聽天鷄登覽日觀峯空聞
覓蓬萊蹈海鞭雷公蒼蒼海隅在咫尺想像六合同昭

融真人開天得賢佐明良千載今遭逢至和薰蒸彌宇
宙窮崖絕谷無陰霧二儀清寧風雨若四溟偃息波濤
空化日舒舒煥陽德千秋萬歲歌時雍

南院屋敝甚雨至輒漏戲呈石菴南山二司空
三日三夜雨如注黯黯沉沉還弗休黑雲如山壓厚地
廣衢積潦堪行舟中庭忽漫成陂塘鼃黽蛙蟲喧兩廂
陰陰濕氣凝不散蝸牛鼠婦升頽牆古屋此時漏交下
點滴初聞漸飄灑長日終宵陸續聲補葺隙罅誰能者

童兒婢子驅紛然。盆罌甕盎列滿前。支東備西不暇給。
沮洳寧淖連堂軒。書冊縱橫亂堆几。顛倒衾幃與衣屨。
靜坐須教晝屢興。俯榻還驚夜三徙。抑心耐事理則然。
獨虞覆壓心懸懸。興頽補獎賴公力。莫教蹉跎遺後艱。
臘月同霍渭厓諸公烏龍潭觀打魚用坡翁韻

二首

日高湖水解作塊。水落舊痕出洲背。漁翁招搖沉網罟。
上客遊觀緩裘帶。躍青跳白舉數尾。魴鯉不言羊豕膾。

取物還存愛物仁半釋况乃兼細碎

渭厓命取其半餘復放之

玉花

行看登翠盤素髻早已揚清瀨死生頃刻豈人意萬類誰能逃數外吾聞此中本龍窟須信風雲有時會丁寧莫教輕觸之驅駕波濤赴溟海

平湖如席洲若塊漁子擊水驚魚背一網數鱗如拾芥駢頭貫頤相縈帶饗人揮刀飛雪花座客停餐談玉膾祇須一嚙賞風味莫教大嚼嫌微碎天生食物為人用畜牧山林與溪瀨縱欲暴殄乖好生異說更求常理外

座有言物命者呂涇野
言天生養人不足較

一尊笑談聊適爾千古襟期誰

復會擬學任公釣巨鰲須製長竿向東海

打魚紀事少司馬良所已兩和末復有述懷之

篇因奉答

寒窻語呶坐如塊正憶陽和欣曝背病軀厭事每忘櫛
貴客臨門愁束帶古訓微言費鑽討理義悅心如啖膾
絺章繡句我何有小技雕虫嫌瑣碎劉子才氣銳無敵
鷹隼脫條船下瀨與我論交三十年顛倒脫落形骸外

從來知已不易得
牝牡驪黃誰識會
俯仰乾坤一慨然
我欲乘槎泛滄海

借韻戲擬大言一首

天為積氣地積塊
四極八埏作肩背
泰華卓犖奠兩案
江河縈紆橫一帶
揚斗柄兮酌天漿
截鵬觜兮作穀膾
手擎日月弄明珠
足躡山河嫌細碎
獨騎鳳皇參帝庭
坐掣蛟龍畜溪瀨
搦長矢兮射九鳥
揮雄劍兮倚天外
浩浩獨入無窮門
渾渾自與元氣會
已將萬古等須臾

更蹴三山填渤海

題蟠桃圖為嚴梅池節推壽母

瀛海無垠波吐吞神仙差我莫海門蟠桃老樹屈鐵
根結實如盤經千春翩翩者誰西王母雙成飛瓊儼左
右褰裳矯首望霄漢捧桃欲為三仙壽三仙者一南極
翁逍遙鶴馭來南東流雲擁霧乘長風青鸞黃鵠紛相
從良工多苦心用意下筆真世間有此靈異境一朝忽
向圖中親梅池嚴子青雲彥堂上慈親壽彌健丐得此

圖要我歌慇懃再拜高堂獻高堂五月薰風吹錦衣綵
服膝下趨嚴子愛親純孝無窮期恨不真有此桃來侑
長生卮吾聞嚴子為政仁且明盡心折獄多寬平釋之
定國將無是一郡六邑騰頌聲子有善政母心足和氣
致祥凝百福況是千人萬人祝母今已注長生籙

天馬歌贈馬鶴沙二孫

渥洼之水龍馬窟代出異種超凡骨此有老驥真權奇
俛首恥伏櫪平生遠志弗一施厥子更神俊聲譽已四

馳會須伯樂一顧價百倍脫銜奮迅開霜蹄偉哉二馬
顯晦雖殊總莫匹房星之精此降謫鍾竒毓秀自不乏
今看更有二駒尤雄特骨骼開張氣軒勇先天汗血由
來重雙瞳炯炯望四方使我一見神為竦將來豈受尋
常羈天閑掄入應有時和鸞清節乃餘事屬車天仗隨
鸞旗朝吳越兮暮燕薊變化何啻藐千里過都歷塊看
騰驤周王八駿應同紀君不見物有美惡百不掄庸常
世上何紛紛二駒者風雲得志騁高步媿殺駕駘逐後

塵

題畫牛

朝來餉農過東菑有客持畫乞我詩人言戴嵩畫牛世
莫比試觀此圖將無是是何形狀意態俱逼真寫物如
此幾有神老牯安閑卧原野小犢依依亦閒暇莫非春
深耕耨餘長暑應知桔槔罷我生自少聞吾松人希服
賈俱勤農十室五六養此畜乘時力作多牛功兒孫世
守若恒產爾家我室還相通邇來年荒民缺食况復徵

科令行急賣牛與犢輸官租能有幾家猶似昔還客此
圖起長吁我有一語君莫嗤何當有術叱之下給與農
人負犁耙

題鄼侯主餉圖

羸秦鹿走劉項爭得人者昌失者傾漢家基圖肇關內
鄼侯輔之王業成填實國家撫百姓饋餉轉輸獨當任
飛芻輓粟供三軍調發徵行令維繫關中迢迢道阻長
縈紆詰曲遶羊腸十步九折灣百步三迴岡師行糧從

星火急羽書四馳紛蜩集大車彭彭牛駕軌扳巉岩兮
越阡陌千輪萬轂聲喧逐百夫前呼萬夫隨公事有程
食不暇勤王敵愾寧辭推陸陸續續鴉引翅聯聯翩翩
鼠銜尾去者自去來者來去來若流水餽糧充軻
千倉箱士飽馬騰軍氣揚情見勢屈敵師靡楚歌聲起
悲天亡赤龍日奮騅日蹙手掖劉郎御黃屋三章約在
人心歸漫有鴻溝已更局坐臨九州稱大君昔日主吏
今宗臣大業固非一士力冠代元勛誰與倫俛仰乾坤

幾易世逐鹿羣雄今已矣伊誰下筆多苦心宛然若見
當年事石路磊砢山嶠嶢披圖已覺心搖搖假有此地
復此役孰不酸心并軟足更肯冒此捐軀勞乃知良工
鄭重畫此有深意寫出艱難與人視圖王創伯非偶然
具在生綃盈幅裡

雙栢行

玉堂雙栢搖清秋高標夭矯枝相糾常疑風雨晝冥晦
平地墮下雙蛟蚪靈根自是來新甫尚覺徂徠差媚嫵

氣接中天雲霧深節經朔地冰霜苦閱世不知今幾時
前人遺植後人思雨淋日炙蒼蘚合扶持定想煩靈祇
附日貞心應自重長材欲效明時用只今未必凌雲霄
正直終看作梁棟蜀相祠前空鬱蟠巴東縣裡亦曾看
何如此樹植此地飽滋雨露棲鳳鸞地隔塵凡自孤凜
仰止吾來常斂衽莫嗟匠石遲斧斤贏得騷人費題品
吁嗟此栢亦遇時蟠踞落落真瑰奇君看山中豈無大
木倚絕壁槁死蒿萊誰得知

題邨居圖

邨居有圖誰所寫丁子畫師玉川者玉川作畫筆格奇
頗愛斯圖古而雅數間茅屋依山前槎牙老樹搖蒼煙
秋風蕭蕭日慘澹草木黃落無暄妍山石磊砢疊垣堵
薜蘿蔓延入庭戶柴門白晝雞犬靜更少公家索租賦
邨中之人不出邨年年力農甘苦辛不願囊中富金玉
只從屋底長兒孫此時前林山雨集溪頭陰陰水雲濕
大郎拾穗當階翻老嫗妝衣遡風立行人堤上衝冥濛

蓑笠歸來惟老翁草泥深深牛叱叱半肩濕楚相追從
鵝鳩聲中日將旰新婦厨頭已炊爨牛歸作勞有新芻
人行苦饑飽喫飯屋角稻堆如屋齊明年且喜無啼饑
羨渠更有可喜事小犢春來堪負犁我聞近時催科亦
良苦失業往往離鄉土有屋有牛如此稀知是州司好
官府張子磊落廊廟珍念茲民事慎意真示我斯圖俾
有述發揮風雅慙非人我亦田家海東住幾日對此心
神聚安得更呼玉川老圖寫龜風獻當宁

夜酌聽顧挹江彈琴

秋堂夜酌夜未闌佳賓雅懷各盡歡虎頭孫子擅才調
取琴為我一再彈含宮調商泛清徵五音聯翩在其指
情移境易不自知峨峨洋洋良有以恍疑坐我徂陰
颼颼如聞萬壑吟九臯月明風露冷戛然午夜揚清音
瀟湘瀾漫接天流浮雲今古同悠悠使我興落煙波裡
便欲拂袂乘扁舟大音寥寥世傳寡繁聲綺調何為者
子從何人相契授秦箏趙瑟風斯下輕調急鼓無不宜

幽深慷慨還平夷嗟予羈懷久悵鬱此際為子心神怡
夜深囊琴子欲去我猶未能盡其趣明朝有意肯重過
拭几焚香注清醕

題屏障

團團碧樹遮宮牆老梅吹香春晝長錦屏三面圍繡床
中間獨踞長髯郎烏紗綈綈服芳指顧意態何徜徉
鶯鶯燕燕侍兩傍八妹妍麗非尋常明眸皓齒雲鬢光
便儼綽約宛清揚迎風嬌立垂輕纓行行環珮搖鳴璫

龍腦入縷生暖香餘寒猶試羅衣裳爭妍競媚誇新妝
承顏賈寵未肯降粉香叢作溫柔鄉懽娛鎮日心始償
生平事業成亡羊共言此樂殊未央此樂殊未央豈知
浮世多滄桑古今頻仰炊黃粱百年憂樂都兩亡當時
盛麗今渺茫漫言遺跡存縹緲翰林先生鐵石腸因觀
此圖長慨慷靡曷自昔招不祥養心寡欲聖所臧不獨
有國懲淫荒

使郢昆陽城弔古

昆陽城頭秋日淒
昆陽城下沙塵飛
風煙蒼茫鳥不度
黃狐白狐向我啼
當年炎祚遭中否
鬼魅因之盜神器
世厭王田偽井行
天教白水真人起
想當尋邑驅兵來
百萬氣焰如風雷
虎豹咆哮助威猛
已視漢種如灰埃
小怯大勇吁可異
殺氣殷殷動天地
前徒倒戈勢若崩
百萬雄師一時潰
堂堂大義聲四馳
天意所向誰能支
炎精再噓復故物
祀漢配帝崇丕基
世往江山尚如故
城堞週遭宛樓櫓
撫事弔古增慨傷
高情獨有坡翁賦

嚴尤小豎非英才委身篡逆胡為哉留芳不能乃遺臭
千年唾罵誰為哀代遠已無冤鬼哭野老時時得遺鏃
我來無暇訊從容想像猶然愴心目只今海宇當清寧
間閭不聞刁斗鳴乾坤帝力爾不識但樂犂鋤歌太平

題新建李白祠

李唐開元全盛日文化昭宣異人出夫君自是長庚精
炯炯墮地羣倫驚胸羅珠璣爛星斗筆鋒造化驅雷霆
金鑒召見至尊喜賦詩揮毫疾風雨聲華氣岸壓朝紳

妾視真妃奴力士塵世齷齪不可留騎鯨復去崑崙丘
竭來宇宙成千秋一朝還作荆襄遊荆襄之堧蘭江上
山紆水環景清曠此時突兀開新祠萬古詩豪揭高榜
地因人勝古則然從此蘭江重穹壤

漢江歌贈柯雙華

吾聞漢江之水出自岷冢山綿亘荆楚相迴環鯨波浩
渺自今古狂風日夕生濤瀾天吳崢嶸陽侯赫神蛟巨
鼇相掀擲驅雲擁霧見精怪旁激橫流無紀極古復實

屆江之干平疇沃野何恢漫時維曠旱得灌溉不爾正
復為時艱楚地從來况多雨毒靈平地成沮洳江濤沃
溢失巨防大浸滔天莽無處歲用荐歉民阻饑矧迫公
稅多流離日復一日歲復歲坐見凋敝誰能支廬陽柯
子真偉才邇年秉節湖湘來仰承德意宣化理重為民
隱勞區裁具版築兮較章程動大衆兮躬拊循佚道使
民樂趨赴千鎚萬鎚從如雲堤成直走數千丈長虹蜿
蜒卧江上即教霖雨溢江波滔滔循涯只東向沮洳已

變高原空眼看四野回春風爾疆我畝各待藝流離盡
復時和豐堤上沉沉萬楊樹堤邊隱約人家住樵唱農
歌聞近遠牧馬芻牛散朝暮西湖漫自多坡翁武皇瓠
子空稱雄漢江有堤自今始樂樂利利無終窮我言柯
子真能為民興大利除大患已聽民謠萬口碑還徵士
論千年案誰當異日傳名臣今我且為歌江漢

壽圖提學謝侍御請賦

春陽煦物濃若飴蟠桃結子何累累仙童捧出來瑤池

大如盎鮮凝脂太和孕毓流華滋三千年方一見之
當年曾許曼倩窺豈知後世更有偷桃兒謝子純孝天
應知奉親愛日拳拳私阿母聖善仁且慈庭前蘭桂森
歲穉高堂長日薰風吹祝釐設悅當此時飛飛青鳥來
致辭桃今再熟為子貽助爾上侑長生卮福祿單厚生
期頤

雲岡歌

龔雲岡宮諭擢南司成即其雅號歌以贈之

吾聞閩中山水多秀靈舍奇蓄怪流光晶上有危峰峻
崿負出煙塵表下有巖泉千道百道噴薄如雷鳴金波
揮霍蛟龍戰噓氣往往聚作雲英英南臺忽報靈沙合
神光上映奎星精龔家書屋值其下鬱葱佳氣遙相射
讀易時時藜火然朝看寶劒雙龍化爾時共說雲岡子
符禎協瑞憑空起天人有策獻彤庭一日名稱動朝市
御筆親題第一人天門鳳翥驚羣倫詞林講幄見風采
唐虞治道時敷陳爾時雲岡之雲爛五色章施黼座椒

蘭焚皇華有命曾專使玉帶生輝爛文綺夷傲爭看識
鳳麟聲華實為明時瑞留都昨去叅文衡得人不讓歐
陽明文章一變宗大雅學子文儒爭法程帝睠留都根
本地大學師模風化寄疇咨簡命俾君往禮樂陶鎔淑
多士君不見鍾山有雲日舒舒雲岡之雲行與俱氤氲
蓄洩作時雨枯荄鬯達均沾濡天賦君才棟梁器姓名
應為重瞳記囑君茲行無疾驅會有徵書隨日至願言
雲岡之雲益弘敷大沛甘霖遍遐邇

句曲山房歌王克齋司徒請賦

句曲古靈壤嵯峨屹高空遙聯峨眉秀近接鍾山雄傳
聞茲地神仙居卜築今有高人廬高人誰歟世居此今
司徒公太原裔司徒精舍山之陽林屋窈窕開青蒼門
前溪九曲屋後松千章水石嵐霏地深迥自喜幽棲遠
人境讀易梅窻清夜徂鳴琴草堂白晝靜山中昔有華
陽翁著書於此巢雲松玩雲聽松自怡悅獨善不救蒼
生窮司徒當年早致身大鵬九萬排風雲敷歷内外三

十載賸有事業揚清芬頃來都門得良會示予山圖同
展對知公身在霄漢上故園時時勞夢寐鴻飛矯矯羨
莫扳衡門幽幽生暮寒頗疑中林猿鶴怨幾見石徑莓
苔斑小山桂枝高幾許木落清吟山鬼語翠巘秋來多
白雲玉田春深漲紅雨公今正作商家霖忠藎九重知
眷深崇崇鼎鉉日柄用迢迢故國空馳心他時功成冠
擬掛再向山前開綠野

登瀛圖

維揚李子石鹿臨川張子西吳餘姚胡子曰
門既舉一甲進士拜官詞林乃相約倩工各
繪圖侈榮遇人以其一家藏焉予為賦長歌
一首紀之

長安旭日光瞳矐黃金之宮五雲中和風駘蕩春融融
六街三市人叢叢千家啓高門十里飄香塵綠楊紅杏
蒸如雲行人快覩三郎君郎君馬上好丰采此時見者
誰不愛宮袍初着裁制新唐巾樣古流風在武夫執蓋

前導行徒御肅穆無譁驚垂鞭蹕袖貌閑雅頰仰意態
春風生蕭蕭如聞驄馬鳴調良亦似知人情後從者誰
大京兆紛前擁後真光榮即看此幅誰所摹人言誇官
本我道登瀛圖三郎君者孰姓氏有美李子張與胡秀
發山川盡英彥良工筆下開生面九州四海莽寥濶恍
惚圖中一朝見同升之義非偶然侈恩紀盛誇當年豈
惟睽違代瞻對還使異日兒孫傳吁嗟人生賦命有窮
達致身如此寧非傑亦知溫飽非雅意更有遠大事業

希前哲

漢宮春曉圖歌為克齋司徒題

斜日吹落明星稀漢家宮裡春雲低
銅龍漏靜午門闌魚鑰聲傳萬戶齊
此時六宮人盡起寶鏡熒熒對梳洗
螺黛粧餘積翠煙殘脂滌去流紅膩
龍腦入縷羅衣香珠鈿玉珮鐸鳴璫
試問宮中誰第一趙家姊妹誇新粧
東風習習春猶淺小立徐行嬌步軟
夢餘楊柳尚含顰睡足海棠猶力倦
簾垂翡翠掛珊瑚漸觀花影搖金鋪

閒理玉箏調錦瑟官家上直聽傳呼列屋盈盈盡妖冶
負寵爭憐不相下飾貌何如飾性情當熊辭輦何為者
容光或有覆盆遺燕笑寧知泣向隅歌舞昭陽競春好
淒涼長信恨更遲春去春來年復年人生豈得常嬌妍
忽忽愁中添綠鬢匆匆鏡裡改朱顏滄海桑田詎勝道
富貴榮華孰長保試看當時盛麗區只今無地生芳草
謝錦衣孫伯泉寫菊見惠

孫侯贈我此畫菊我疑圖來自甘谷昔時黃筌少傳派

近歲陶成共機軸怪石磊磊苔蘚斑蒼崖屈曲鳴高湍
輕紅嫩白巧相錯黃金紫玉紛成團石根細草青綿茂
三四簣簣森作叢野花無名亦競秀雲煙澹浥開秋容
我家故園東海側籬落年年費栽植別來歲久應荒蕪
天涯對畫空相憶我言孫侯畫菊不是畫精神似與菊
俱化晚節寒香秖自知精思妙墨何論價坐翫還多逸
興生騷人千古懷幽貞更須孫侯拂絹素畫取老夫餐
落英

送鄭東湖

我昔南雍識鄭子，頽仰乾坤三十年。中間萬事何不有，浮沉變幻如飛煙。鄭子才氣自超特，讀書五車富文墨。脫穎期看出萬人，低回坎坷誰能惜。竭來馳驅佐郡忙，有才無地堪迴翔。英氣往往不自秘，珠光玉潔難摧藏。茲晨逢我喜絕倒，昔皆少年今已老。祇用高吟慰寂寥，莫思往事傷懷抱。男兒有身慎勿輕，百年意氣須崢嶸。不見古來賢豪士，豈必卿相方垂名。疾風吹帆子當發。

楚水吳山坐超忽撫劍長歌遙送君後夜相思共明月

雙巖歌贈樊司馬

君不見陰陽之精互凝結凝結為石天地間又不見天
星有時或墮地形質變石悍且堅吾聞魯國樊氏忠孝
門乃有巖石雙雄蹲不知二氣凝結抑是星所化鍾靈
萃異特立無秋春拔地特起僅逾丈形勝似出千尋上
峻增或訝經雕鐫巉犖固知難髣髴嵌空中通日月明
潤澤時有煙雲生文章璀璨煥華彩節槩磊落磨蒼昊

天生異物難蔽藏帝命移之置明堂風神久矣聳朝署
聲價復見騰遐方吁嗟世途日靡靡滔滔橫流無極止
屹浮鎮躁誰能當故為茲巖致傾企願言貞固矢弗渝
留取孤標重千祀

涇原行送王南江郡伯之任

五馬何翩翩金帶緋袍鮮王子且駐節聽我歌涇原天
下都邑稱關中關中要地涇原雄山川秀拔更險阻襟
帶中華今古同黃河匯其陰崆峒奠其陽左控右扼稱

四塞面勢博大森開張風氣朴茂近淳古習俗沉雄盛
材武先王德化儼猶在尚義知方似鄒魯重城屹屹稱
雄奇邊人亦或窺郊圻彎弓矯矢射漢月百里時見烟
塵飛漢家保障重刺史況是茲邦逼戎壘往哲勛名代
有之豈無尋常牧民比王子才識真罕倫不是尋行數
墨人寵命新承人共羨拂拭干將意氣振朝辭帝都城
遠望涇河水可藍山下青草深勤武堂前暮雲紫綏戢
流殍甦沉疴十邑釀作春風和省農時露冕弔古還悲

歌書生共說知我寡試看往哲何為者休教桴鼓動邊
塵莫使蕃人來牧馬我歌涇原行送子之涇原期年側
耳報嘉政佇見徵書下九天

荊陽草堂歌

荊山之陽侍御李子有居在焉故以荊陽為
號予雅重李子作荊陽草堂歌以贈之

荊山矗矗山之陽層巒複嶺雲錦張左拱右揖如騰驤
面勢軒豁非尋常枕麓緣岡若屏倚地脉蜿蜒萃靈氣

隴西之裔今聞人選奇卜勝來居此薨連棟接如雲屯
鳴雞吠犬聲相聞豈惟世德稱詩禮更喜民俗還熙淳
柳院槐庭地深迥日月迴環自朝暝藥欄曲曲春風香
草堂幽幽白晝靜斐几蠲潔紛圖書鳴琴鼓瑟搖瓊琚
鴻生雋士來雜遝敷陳禮樂歌唐虞主人今為明時需
焯焯聲價同璫璣鐘鼎勛庸會有待猿鶴山中莫怨吁

東歸別詞林諸君子

秋日煊煊照客衣一鞭款段出燕畿詞林故人走相送

欲別不別還依依白雲遙遙望何極老去莫愁天地窄
百年忠孝總關心回首君門淚沾臆

問月

昔年李白問月曾有詩我亦有語申訊之一從開闢有
天地不知爾月還與天地先後來何時同日在天作兩
目何為行天有遲速妖墓何能蝕爾靈狡兔何智入爾
腹吳剛斫斧何得休羿妻到今還在否既云盈虧有定
理何用三萬八千戶歲歲年年脩復脩古往今來幾經

世古人今人果同異乾坤變故日相尋照見吾人幾榮
瘁世道日降民生病見之應為達天公為天目精爾恒
職不爾雖見誠何庸問之嘿嘿了無語還駕綠雲天外
去老夫空齋無所為矯首蒼茫自延佇

觀梅行次答富春山

春山先生性超逸山水平生好成癖探奇覽勝不憚勞
楚蜀名山遍經歷謝政歸來更蕭散天與清緣誰解管
擺脫勢利羞醯雞尋樂似嫌人世短竭來復作觀梅行

吳嶺梅開春正晴輕衣緩帶自容與閒雲野鶴同高情
玄墓山中梅花窟千樹萬樹難髣髴玉綴瓊鋪迷近遠
英郁芬芳盛蓬壺四方上下縞素同虛明鏡裡無人踪
人行樹間如踏空十里廿里飄香風凝霜積雪揉晨曦
霏霏霧靄沾裳衣萬籟沉沉莽寥閒不知身世將何依
恍疑墮自冰崖裡瓊樓玉宇將無是塵世區區何有哉
庚嶺孤山真巖爾吾聞海上姑射山神仙乘雲時往還
路通玄墓理或有靈詮寶訣君曾傳餐吸沆瀣和玄津


醞釀藻思詩清溫言言絕無塵土氣句句尚帶梅花春
多君示教感至意頓豁老夫神志昏

石川行寄贈張子

天下之水莫不行地中千流萬派紛相從是誰鑿破雲
根與山骨疏滌洪源流蕩滴橫波揚流自演迤雪激雲
奔湛清泚陵谷尋常有變遷此川從來無轉徙十里十
折千盤渦兩崖壁峭青銅磨滔滔似是出水窟浩浩遂
欲浮銀河銀河迢迢貝宮闕波濤慘澹魚龍穴時聞仙

侶採靈芝亦有幽人釣明月幽人選勝誰所居張子結
屋川之隅仰止宣尼喻道體閒思曾點詠風雩憶昔乘
時曾致身銀花帶綰垂朝紳碧山悠悠恒入夢野鶴矯
矯終難馴一朝回首動歸興脫屣功名遠塵徑石室重
開雲霧深風林再掃莓苔靜暫向明時作隱淪舊時魚
鳥還相親玄真豈屑釣餌設季鷹原不為思蓴浮名何
如一杯酒封侯不博詩千首博望乘槎去已遙平子思
玄賦當就石川子石川有子今不孤水石發秀潤風煙

自朝晡四時佳趣無時無嗟嗟石川之川詎惟此汨地
滔天靡終止龍升雲從捲取茲川水沛作甘霖遍遐邇



文簡集卷二十一

欽定四庫全書

集部

文簡集卷二十二

詳校官中書_臣葉元符

中書_臣劉源溥覆勘

總校官原任中允_臣王燕緒

校對官修撰_臣戴衢亨

謄錄監生_臣唐作梅

欽定四庫全書

文簡集卷二十二

明 孫承恩 撰

七言律詩

拱宸樓次韻

南都作

閒來登眺有危樓時倚闌干望斗牛帝闕九重浮王氣
都城千雉隱高秋故鄉回首嗟王粲上國馳心感魏牟
萬里壯遊方浩蕩為君含笑看吳鉤

奉詔初入翰林讀書

詞筆應慚擬上林
濫從此地仰奎參
傳經新授義皇畫
分課還賡正始音
碧殿面臨瓊島近
紅塵遙隔木天深
聖明作養拳拳意
圖報唯應矢寸心

齋居次戴師觀韻

玉署齋居總列仙
劇談深夜不成眠
棋當殘局多奇著
詩到終章得勝聯
銀燭花搖風入戶
空庭人靜月中天
高才獨有東臯子
惠我重吟白雪篇

賦玉河春水

迢遞中天接尾箕，雪消春漲欲平堤。
搖空行帶根猶淺，刺水蒲針色未齊。
澆養儘教容魴鯉，禁嚴時亦下鳬鷺。
中涵聖澤應無限，騷客還能發興題。

送謝水部陞湖廣少叅

曾聞水部盛才猷，江漢旬宣羨勝遊。
藩府獨承民社重，東南方切廟堂憂。
才如安石年猶少，詩較玄暉語更遒。
隨處行春多逸思，吟成應為寄西郵。

約諸友遊萬泉莊二首

萬泉莊上風光好，共約明朝試一過。
客裏賞心能有幾，城南村落況無多。
不須腆洗供高會，只用清真稱雅歌。
俗務莫因成繾綣，試看春事又蹉跎。

一鞭款段喜陪君，指點高山多白雲。
地勝好教毛穎記，泉流擬把羽觴分。
偷閒日月供瀟散，放浪襟期薄世氛。
幸際清班無俗事，太平游衍敢離羣。

送友人歸壽詩

白日涼風吹舞衣天涯遊子動歸思地分燕越人圖繪
壽祝期願我賦詩膾切鱸魚秋入饌飯蒸香稻雪翻匙
望雲亦有江南興無計隨君空忸怩

初度招友人小飲二首

客中明日逢初度回首令人嘆式微百歲又看添賤齒
一尊誰與壽慈闈遣懷聊復頻敲句會客何妨更典衣
馬有青芻奴白飯早來相就莫相違

我亦明朝初度晨壯懷旅思一時新半生圭竇頻看劍

此日清朝忝進身
媿以文章要寵祿
誓將忠孝答君親
詩成一笑公應和
如約還來與細論

慶成宴和戴師觀韻

錫宴彤墀擁百官
承空綺幕近金鑾
杯浮法酒澆藜藿
樂奏宮縣下鳳鸞
報國共懷心耿耿
瞻天齊舞佩珊珊
太平未必真無象
慚愧書生只素餐

出郭訪隱士

薰風原不起塵沙
一路吟鞭趲落花
地遠怪君知我至

鵲聲先我報君家山穀野蔞頻行酒石鼎松根細煮茶
不盡留連還別去夕陽天際已歸鴉

和十峯遷居韻

卜勝知君亦苟安重遷媿我結隣難相思忽漫驚駕馬
乘興因來看藥欄喜有詩篇成款洽不須雞黍共盤餐
乾坤去住聊隨意攜手空庭一笑看

題吳學士先生白樓三首

廣寒境界不容緇純堊全無綵繪施雪霽偏宜蘇子興

月明還詠庾公詩清虛自是無塵地質朴元同太素時
千古義經敦白賁誰云獨許漆園知

心遠何妨近市廛直於太古泝先天至文亦自元從質
大雅誰教獨尚玄外擾不令紛俗慮內觀無自染塵緣
東溟月上西窻白正是先生穩坐禪

層樓新構五雲邊古朴無華質自全混沌別開非色界
虛明即是小壺天入簾柳絮渾無迹拂棟梨花失故妍
可是玉堂清絕甚夜深風露獨淒然

中秋夜攜酒訪戴東濱

月色星光澹欲流，忽驚客邸又中秋。
一年好景惟今夕，三載萍踪只浪遊。
悵望懸知千里共，孤斟難遣十分愁。
極憐知己惟安道，乘興還同較酒籌。

齋居奉和費鵞湖老先生韻四首

陪祀羣工重廟堂，遙瞻台席駐宮廊。
祠分斗極將靈幣，地切鈞天荷寵光。
奏對豈無忠悃布，精神還憶駿奔忙。
曳裾我亦叨餘庇，稱頌無能意獨長。

忽遞高吟到玉堂從來大雅仰巖廊欲傾鄙意歌棠棣

驚湖弟子和太史同宿翰林

敢以鉛刀齒末光識短望洋聞道晚才

慙刻燭構思忙蓬瀛不禁清寒甚嘹唳空庭鶴唳長

風傳銀漏到虛堂月色娟娟轉牕廊自信齋心無俗擾
獨憐倚玉藉餘光笑談應作他年話追逐真成兩日忙
再詠陽春多警拔諸君才思儘優長

良夜齋居倚玉堂起聽宮漏步長廊淒風忽來作寒悄
澹月乍出延疎光忽忽感時淚欲滴渺渺懷人心獨忙

明發出門有公事擁衾不寐哀歌長

和答戴師觀

清詩寄我實堪驚入手驪珠照眼明
千古文章宗大雅百年交誼見高情
賈生問學年猶少王勃才華早更成
淺陋慚余似曹鄴強從齊魯乞新盟

授職後感懷三首

盛世儲才侈禁林庸愚叨備藥籠參玉堂
晝暝消香篆金闕晨趨響珮音健鶻搏秋雲漢
濶長鯨跋浪海天深

此生圖報師前哲獨對遺編萬古心

三載虛叨作養恩拜官仍許列儒紳受知何以酬諸老
許國惟應致此身紫禁天回鸞誥濕御爐烟泛鵠袍新
不將榮盛誇遭際有待迂忠得上陳

端居深念獨長吁且向燈前一掩書四禁願言今日始
三長應媿昔人如滄溟誰謂堪憑葦峻坂何由可駐車
肯以清閒供放逸勉旃深為惜居諸

秋日旅興三首

天際涼風似水流。帝鄉城郭動高秋。誰家短笛吹殘月。
是處清砧攪夜愁。千古壯懷時拂劍。一秋病體倦登樓。
吳淞江上多幽事。欲棹蘭橈不自由。

滿耳西風不住吹。客中又見早秋時。懶慵未上匡衡疏。
搖落先添宋玉悲。鄉國思牽人病瘦。江湖雲冷鴈書遲。
小樓日日支頤坐。悵望高天有所思。

抱病登樓縱目時。無邊旅思益淒其。長空黯淡朝雲暝。
落木蕭疎暮雨悲。半世光陰黃卷裏。百年心事短檠知。

故園兄弟多清賞采采黃花飲對誰

送郭愛芝還吳兼致壽意

江湖放浪一閒身共說高風似古人老去陶朱猶貨殖
秋來張翰忽思蓴一鞭行色都城雨千里歸帆海上春
聞道餐芝能得壽尋常桃實不須論

次韻送內兄吳菊坡南歸菊坡送予母并家口
至都下楊升庵諸君有詩餞之

驅馳我亦厭京塵千里勞君意轉親流俗不緣少高義

諸公何以發陽春
幾番風雨撩鄉思
一笑乾坤落醉巾
采采黃花歸去好
新筇應稱薦香蓴

春日邱中寫懷

自在東風百尺絲
輕煙晴日晝初時
幽居謝事客來少
小閣垂簾雲去遲
閑試松煤臨舊帖
旋添栢子和新詩
極知踈懶成虛度
無補乾坤自忸怩

馬上望西山

西山日日望中懸
空翠遙飛落馬前
千古神基蟠厚地

六陵王氣接中天
晝長瀑布飛靈雨
春暖晴岩起瑞煙
媿我塵踪常碌碌
無由乘興一扳緣

贈扇與王南渠

南渠夢余贈之扇以告余因奉一柄實其事
併副以詩

午夜青冥風露寒
素宏何處見東山
偶從赤壁磯前路
拾得瑤臺月半彎
一笑恍疑蕉下鹿
三生今識樹中環
西風篋笥淒涼日
又是人間夢大還

秋日感懷八首

五茸城下草離離
三女岡前落日低
歲月無情今古換
江山不改市朝移
智如螽斯翰寧非
達才似機雲不濟時
頽仰乾坤意無限
欲將長筵月中吹

十載皇朝侍從臣
文華殿裏說書頻
瞻天實傍龍顏切
賜食親承帝語真
海嶽無能裨壤滴
感孚常擬滌心神
一歸茅屋驚遲暮
翹首中宵仰北辰

鳳閣鸞坡切帝居
西奎東壁映圖書
孫弘待詔依金馬

劉向傳經老石渠
檮標豈堪明主顧
草茅曾有樸忠摠
飄蕭短髮丹心在
吟對西風思有餘

帝京西北是巖疆
萬里煙塵接大荒
極目凍雲沙浩浩
孤城哀笛月茫茫
窮年羽箭傳青海
何日邊庭致白狼
往事唐家那可說
略聞屯卒恣披猖

長安聞說多營建
盛典千年復見今
已是遐方徵杞梓
更傳絕域採瑤琳
羣公爵賞行將及
四海供輸恐不任
牢落江村秋色晚
不能無動杞人心

霜隕千林木葉稀陰陰邪日蕩寒霏空江水落魚龍蟄
絕塞風高鴻鴈飛齊物更添莊叟論紉蘭堪製屈原衣
向來世故浮雲似何俟他年始息機

蟠龍塘上舊菟裘萬古傷心土一丘未有涓埃酬鞠育
空餘涕淚灑松楸歲時獨為烝嘗謹禾黍行將次第收
寂寂思菴秋日晚荒苔落葉不勝愁

秋風日夕撼庭柯冉冉流光劇逝波曠野忽聞鳴鶴迴
寒莎猶自亂蛩多得來詩句閒題竹寫就黃庭不博鵞

宋玉平生未聞道更因搖落嘆蹉跎

飲萬松書院

曲徑穿松到上頭飄蕭虛館似深秋風傳靈籟箏竽合
月出空山沆瀣浮千古壯懷增感慨一尊深話且夷猶
登臨不盡探幽興更擬明朝取次遊

舟中早發

月落未落天漸明船頭打鼓將欲行啞啞客舟棹齊發
喔喔遠村雞亂鳴乾坤擾擾有行役世路紛紛多變更

迂拙無能裨上下却慚到處費將迎

夜坐

向晚書齋坐亦奇滿天明月閉關遲儘將寵辱拋春夢
一併乾坤入酒卮隔水荷風時細細傍簷花影故離離
露華不計沾衣濕直到西林月落時

月夜與客閒步中庭

虛館良宵風月清重門杳杳斷人聲試拈酒醖三人共
笑踏花陰一逕行故舊頓疎難會面乾坤俯仰總關情

暫時乘暇貪歡賞日出明朝事又生

雨後種竹

帶雨移從遠寺來自攜錢鑄破蒼苔直須舊土連雲起
更記南枝向日栽風動只愁龍化去月明應有鳳飛回
莫嫌生意蕭疎甚會見深深一徑開

赴安南二首

萬里南征亦勝遊秋晴況喜瘴煙收獨慙淺薄虛王命
肯使風塵浣客裘蘇節從知完入漢越裳行見早朝周

寸心北極瞻依切千載令人感魏牟

迢遞交南瞻海隅一封遙降紫泥書九天湛露懸征旆
載道清風擁使車諭蜀竊慙司馬檄出門忍看太真裾
天涯落日重回首白髮蕭蕭獨倚闌

錢塘侯崇禮至有詩因和答

漠漠秋陰雜雨霏登山有興漫都違坐深駟榻吟偏劇
望杳仙舟思欲飛萬里壯心瞻日近五更清夢逐潮歸
相看心事還相信歲晚冰霜共結依

虎跑泉和坡翁韻三首

遠續曹溪水更香雲腴深甃石陰涼百靈呵衛龍天肅
一線潛通地脉長病體偶從窺勝蹟塵心應得悟迷方
為邀陸羽來同宿擊火烹茶試共嘗

洞口風生薜荔香萬松陰護佛龕涼禪僧獨對青山老
遊子貪依慧日長世故極知俱幻想安心何用覓竒方
探幽笑我真成癖一滴甘泉合試嘗

古寺幽深石井香西風吹我葛衣涼數聲清磬晚山碧

一榻白雲秋興長
解脫五蘊本非有
超離四大還無方
為喜靈源已煩渴
覓取遠公涓滴嘗

張文光都閫邀遊西湖

七年不向西湖醉

丙子歲
曾遊

此日真成兩度遊
三竺寺中

秋漸肅兩高峯
頂雨初收雲巒飛
翠迎吟舫水樹分
青落酒甌最愛主
人多道氣不妨日
暮為遲留

湖上早行

寒霏收盡看新晴
曉起偶從湖上行
青天微茫海色動

紅日蕩漾波光明笙歌稍稍遊人集洲渚蕭蕭征鴈鳴
湖山如此正可賞慚愧當年遊冶情

常山道中即事

登登山徑繞羊腸天際孤吹送晚涼烏帶暝煙投遠嶠
馬馳斜日轉危岡汀洲水蒨蒨葭老籬落人家橘柚香
風景漸於鄉土異黯然離思共秋長

經寧藩故地有感

顛冥侯度恣淫荒白日梟鳴自不祥穢迹千年誰洗滅

本支百世自重光故基寂歷生秋草野鳥啁啾話夕陽
人與惟仁天助順獨留覆轍示興亡

文山祠

興復區區竟弗酬百年臣節已全收力窮巡遠寧忘虜
死去夷齊不係周燕市龍歸秋雨暗

世傳公
白龍精

西臺客慟

暮雲愁只今祠下章江水正氣應同萬古流

又用杜韻

危祠江上偶經尋碧殿長松自鬱森落日煙雲催暝色

空山猿鶴送哀音百年臣子匡扶義千古英雄激烈心
梁甫歌殘有餘恨不勝清淚濕衣襟

江行

朝霞翻曙雨初收蘆葉蘆花兩岸秋漠漠風煙隨鳥沒
依依沙樹共雲浮山排疊嶂連天遠潮入寒江接海流
鄉國不知何處是孤舟渺渺獨生愁

南安有懷張東海先生

南邦遺惠霽棠陰東海神遊斷碧雲餘事百年傳墨妙

心期千古賴遺文金螯閣外荒秋草玉枕山前漫夕曛
夜靜屋梁明月下依稀猶似見夫君

舟中夜起

明河西斜月出高數十大星懸樹梢露下寒塘響枯葦
風驚棲鵲翻危巢睡醒呼取明燭坐興盡還將書卷拋
山村漏刻本無據卧聽更人長短敲

擬題鎮海樓

樓開滄海鬱蒼髯彈壓三吳不敢驕千尺蕩搖波影亂

八窻吞吐野雲飄中天笑語疑應近蓬島神仙或可招
回首家山邈何許歸心一片遡秋潮

伏波廟二首

伏波遺廟儼空山落日長煙蒼莽間草色有情侵座綠
苔花無數上衣斑勛名直擬留千古英爽猶能弭百蠻
我欲為公昭素節一杯江水薦潺湲

報主忠勤老益堅裹尸有革即吾棺明珠不俟千年白
銅柱終留百世看絕塞悲風疑鼓角荒山祀典儼衣冠

英雄一去空陳迹落木蕭蕭生暮寒

舟中漫興

日日雲山管送迎合裁詩句答山靈思窮開闕無終時
望入微茫不盡青舵轉忽看孤石峭岸移遙認野花明
他時為憶經行處只記多山不記名

和韻謝吳叅戎

笑談忽奉三旬別旌節還從萬里回白日沸天簫鼓振
青山到案酒樽開殊方滿目多豺虎重鎮分符簡俊才

黽勉尚期功業樹便蕃行見異恩來

和韻再贈

嶺表分符鎮百蠻金湯雄倚屹重關霜清邊塞風塵靖
月照轅門鼓角寒懸肘會誇金作印切雲偏稱鐵為冠
高情未許求閒去絕域須看略地還

吳有退休志故云

借韻述還

離愁渺渺隔雲山回首風塵暗玉關白鴈影沉鄉信絕
滄江日短使舟寒劍光星動宵彈缺客袂霜清曉拂冠

千古伏波多志節一時惹以謗珠還

沃泉鄧太守久淹遠郡報政喜與予偕行有詩

見貺用韻奉答

天涯懷土幾登臺報政今從萬里回
萍梗百年樽酒共笑談一日好懷開
聖朝柔遠非忘遠牧郡掄才見異才
會有崇遷應內補不教茲地更重來

賤降前一日俞厚菴暨沃泉攜酒飲予舟中即

席奉謝二首

賤子明朝初度辰故人高誼重相親
曳裾自是論交舊傾蓋兼逢託契新
有酒且酬今日興無聞空負百年身
孤舟落日寒江晚獨向天涯感慨頻

雲山歸路正漫漫愁緒無緣得自寬
初度又逢明日是一樽聊盡故人歡
曠懷直欲齊今古浩嘯何妨落珮冠
醉去狂來渾不禁欲將長鋏向君彈

初度述懷二首

百年光景故駸駸况復天涯萬感侵
未有消埃酬帝力

獨將迂拙守初心月明江浦猿聲急雲暗山城鴈影沉
慈母白頭應念遠倚門日暮正愁深

學道蹉跎祇未成歲華荏苒壯心驚烏紗不愧青天覆
玄鬢從教白雪生皇覽豈能忘卜夢聞詩猶自憶趨庭
天涯忽忽思千種風木聲中淚最清

謁韓襄毅祠

危祠何處倚高岑碧磴穿雲一徑深精爽九原猶赫奕
江山千古自蕭森伏波勛業曾聞昔魏國聲名合配今

見說近郊還寇盜起公無計獨傷心

蒼梧元旦拜闕

嵩呼聲裏曉寒侵寶炬光中月影沉海宇正當更治日
蠻荒寧異向陽心曾叨近侍奔趨地尚憶親瞻斧展臨
此日南陔心北闕不堪愁對瘴雲深

和陸儼山扈從山行二首

落日重山湧翠波叨從仙蹕寄行窩雲連斗極瞻天近
樹隱寒聲入夜多典禮幸逢窺盛事宗禋合有繼登歌

平原內史今詞伯健筆真能障九河

劍舄先皇鎮此山神光靈氣在人間
玄宮肅穆環千嶂石獸嵯峨護九關
覆載豈能名帝德丹青曾有識天顏
遺芳百世臣民念何處龍髯更可攀

再次二首併述懷

敢於危從計奔波且向深山寄一窩
木落羣峯秋氣肅柝傳五夜月明多
九重紹述尊墳典千古明良喜起歌
珍重廟堂勤治理萬年永保漢山河

乾坤何處托雲山無限幽懷悵望間忙裏詩篇聊漫爾
老來情事易相關蹉跎歲月妨公務潦倒風塵益病顏
猿鶴休教怨遲暮小山叢桂會須攀

元宵後夜鍾石少宰宅次韻二首

賸有華燈續此宵只嫌明月費呼招

連夜月明
此夕獨無

追遊我

自慙時彥讌喜人都荷聖朝小海調高檀板急博山爐
煖篆烟飄孝先才思多豪逸取次詩成不待敲

華燈高照屬清宵我亦疎狂忝勝招賦鳳勉同金馬客

駕鰲還做紫宸朝芳尊荷主深深勸晴雪催詩故故飄
是夕小雪盡興不知更漏促到門立馬待人敲

和李敘翁閣老觀蓮之什

閣外盆蕖競曉風翠蕤碧蓋護新紅移來華嶽峯頭種
幻作仙人掌上工丹渥晴雲涵綵幕芬菲瑞靄散彤宮
調元再見敷成日栽植誰非燮理功

遊鄭園和張水南司成韻三首

城市園林迥不同入門翠靄眩西東叢篁逼仄短無地

曲徑盤旋忽有峰亭上把盃邀落日水邊岸幘倚微風
尋芳竟日成留戀莫計歸途起暮鐘

勝會難期一笑同招延此日荷賢東上客自吟青玉案
野蔬不羨紫駝峰黃塵陸海蒸炎暑碧樹荷亭起夕風
對酒無窮山谷興隔花已聽景陽鐘

鄭谷園居我興同吾園遙隔海雲東一春坐憶浦南雨
此日來瞻江上峰返照漸催歸路暝昏鴉齊噪滿林風
草堂淨榻容相借卧聽城西野寺鐘

昨來南院敘菴閣老有詩贈別和韻却寄

三十年來逐曉珂青袍如故鬢將皤移官恰與疎慵稱
戀闕翻增感慨多官署晚山堪拄笏江門秋水憶乘槎
盈虛曾究義皇畫聚散無憑付浩歌

次溪堂春酌聯句之什三首

門掩東風生薄寒清朝良晤客途難即看隣曲承迎便
自覺樽前意緒寬世事且拋春夢外閑情都付綵毫端
更留餘興重來會錄取鸞牋後日看

座上休辭酒醖寒勸公樂飲公莫難百年安知良會幾
一飯敢負君恩寬遐思直遡邃古上逸興超入浮雲端
長歌慷慨為君發拂拭雄劍燈前看

曲屏芳宴燭花寒官裏匆匆樂會難老去從知詩興減
歡來自覺酒腸寬月臨五夜聞鳴柝候入三陽記履端
韓孟風流吾忝附明朝應有客傳看

梅塘詩寄盛封君

誰把幽芳植水濱羅浮風致絕纖塵寒依淺渚猶殘凍

律轉南枝已占春，即有爐香浮淡爽。
更教涼月助精神，調羹他日賢郎事。
羸取孤高伴老身。

初夏即事

纔見東風掃落英，又看時序到朱明。
一宵過雨柳都暗，幾樹遷喬鶯亂鳴。
簿領少親宜病體，琴樽聊與適幽情。
故園遙憶吳淞上，欲棹扁舟採杜蘅。

文簡集卷二十二

欽定四庫全書

文簡集卷二十三

明 孫承恩 撰

七言律詩

恭和御製翰林院敬一亭落成詩

傑構新看聳玉堂文明誕啓際非常九天睿藻開貞觀
百聖心傳蹈允臧願竭庸愚終龜勉媿無雅頌重鋪張
神功已配乾坤大海宇均瞻日月光

和許松臯太宰宮僚讌集四首

輕烟晴日共蒼蒼勝會叨承樂舉觴國有承祧資保傅
天惟佑命得賢良激昂思越雲霄上笑咏春回几席傍
四海皇風披浩蕩百年文運際明昌

共把忠誠託昊蒼清朝東府洽壺觴論文我獨慙疎拙
輔德時方屬俊良皇極仰瞻宸極上少微遥矚紫微傍
賡歌不盡揄揚意但祝鴻圖百世昌

萬里長風吹鬢蒼百年高會此傳觴勸酬不盡主賓興

披豁真誠交誼良地切瑤山三島上人依金闕五雲傍
願言翊贊崇儲德重繼周詩詠克昌

霜明銀榜曉寒蒼樂飲羣公各盡觴晉接偶同日休暇
謙光並著德溫良堯文炳煥南離上漢幄召堯北斗傍
淺薄廿年叨侍從媿無勛業佐時昌

儼山用韻見贈次答二首

媿扳和璧並頑蒼喜託清光接羽觴一代謨猷夔契盛
百年製作馬班良論交期我形骸外曳履隨公日月傍

調燮即看歸大手佇承休烈頌明昌

荏苒年華雙鬢蒼側身天地一銜觴風雲幸接夔龍侶
樗櫟慙非梓杞良公有經綸裨黼展我惟文籍校偏傍
騷壇今日誰方駕百戰詞鋒氣更昌

疊韻贈少湖

西山晴雪裊蒼蒼恨不時同泛酒觴華髮紅塵嗟我老
青年白璧羨君良朝趨每共楓宸上笑詠能忘竹嶼傍
少湖往酌予小園竹下坐竟日豐芑貽謀均寵命願攄忠赤報時昌

句曲山房為王克齋題

句曲名山古洞天
高人結屋擅林泉
千巖靈氣雲雷出
萬壑晴光日月懸
賸有經綸裨大造
不希黃白註真詮
舊遊猿鶴時相憶
夜夜清光北斗邊

送浦暢齋赴松溪尹用曩歲贈韻二首

一笑驚看別後容
草堂復此晤言同
須知祿仕君恩重
莫問蹉跎吾道窮
路指松源山郭裡
帆開潞水夕陽中
即看寒谷冰霜後
須見陽和次第融

莫嘆霜華兩鬢生一官初喜拜承明詩書好達循良政
才傑寧須甲第名夜月幽齋看劍坐春風沃野省農耕
蓬窻燒燭當年事送子能無故舊情

香山寺來青軒

坐想山亭多白雲飛嵐撲霧共氤氲即看几席青相映
政擬孤高思不羣雨過玉芝春晝永風傳僧唄下方聞
塵緣未了清遊興有待幽深禹穴文

送董羽吉南歸

蘭舟渺渺發江潯文采風流子擅今奉節敢忘懷國念
登山偏切望雲心高堂喜色星辰動先壠恩光雨露深
宦邸蹉跎渾不覺暫時分手思難任

謝大司馬王輿浦惠冰

長夜齋居將寸誠堅冰分至荷高情積陰經日寒猶凜
華潔非礬炯自明掬取已看炎燠解嚼餘頓覺燥心平
虛亭相對無塵俗應與襟懷一樣清

使郢渡黃河

渺渺洪流泛使航蕭蕭寒日淡無光平沙依約雲橫渡
短楫飄搖風滿裳水底魚龍時嘯舞望中鳶鳥沒蒼茫
天書玉節恭承命不似乘槎志意荒

元佑宮

洞府深深靜不譁名山新禮玉皇家琳宮輝煌麗日月
石壁窈窕開雲霞三極玄風昭有象萬年鴻鼎祝無涯
玉田明歲春雨熟更憶此地食胡麻

三洞閣

寶地登臨冬日晴
峇崑芝閣俯重城
山連碧玉諸天拱
江作青羅一帶橫
已占六合孚玄貺
即有羣仙降旆旌
潭下有龍時隱見
夜深來聽步虛聲

郢城有降箕仙者
自云李太白也有贈予詩用

韻奉答二首

太白星精降異才
騎鯨千載復歸來
清風漫拂江濤靜
逸氣遙衝嶽麓開
世外真詮緇寶墨
中天明月嘯瓊臺
懸知太史占乾象
定有靈光燭泰階

騷壇曾仰謫仙才此日神遊漢沔來劍影獨隨孤月逝
文旌高拂九天開蓬萊頂上金光草衡岳中間玉女臺
媿我塵中常碌碌可容叅叩傍雲階

登陽春臺和韻二首

帝居西畔岌層臺舊是先皇駐輦來寶翰仰瞻鏡扇履
恩光常自照莓苔千年盤石河山拱八表風塵日月開
欲擬彩毫干氣象登高深媿昔人才

攝衣晴日上層臺萬里霜前鴻鴈來昭代皇風今薄海

鬻熊遺跡尚荒苔

有殘礎草間
云襄王時物

依依極浦蘭洲出歷歷

晴江烟樹開仰止鉅公慙接武再賡佳什嘆雄才

賈南
鳩有

詩嚴介
翁和韻

沔陽志感二首

早歲從親此宦遊重來五十四春秋更無耆老詢前事
尚有邦人德故侯吏治漸聞隨俗變漢江終古抱城流
州前老檜當時物笑我垂髫今白頭

古復名邦漢水堦依稀往事記當年甘棠父老猶能護

風木孤兒祗自憐輿論已徵良史筆新詞深荷長官賢
遲留不盡王程繫回首重來意杳然

謁先大夫遺愛祠

危祠新構傍湖潯憲府思賢父老心
即有雕題明巨榜更聞絃誦集青衿
百年遺愛無今昔一掬寒泉有顧歆
遊子偶從瞻仰切不堪此日淚痕深

水香亭小飲

并序

沔城外之東北隅有湖中有臺焉每歲之夏

旁多蒲荷之勝雙華僉憲新作亭臺上至是邀
予小酌因以亭名請予名曰水香亭為紀一詩
湖光烟靄兩氤氲此日清遊共使君已着高甍臨綠水
即思短楫棹紅雲歌邀落日傳杯酌風起青蘋寫浪紋
聚散未期題榜在後來應有感斯文

和夏桂洲感賜直廬詩

元臣詔處殿東廬肅肅清宵拱帝居風遞漏聲來禁闥
月移樹影上階除感恩時拜金莖露繕性閒披玉簡書

此日遭逢良不偶，創聞何啻百年餘。

次嚴介溪朝房落成齋居紀事之什三首

大道金門咫尺西，禁廬新構與雲齊。即看淨室無塵到，時有靈烏傍月棲。郢曲久傳當日事，巴謳今和隔年題。二三同德寅恭切，夜直青綾每共攜。

公時同陽峯鶴江齋明年予承乏佐

部

齋居寂寂斗橫西，高閣遙聞刻漏齊。鳴玉時從趨鳳闕，避人不擬學鷄棲。祗將夙夜勤公務，仰荷曄曄拜御題。

公疏請得旨
命工部建

內使每傳催入對袖中疏草獨親攜

西安奕奕門之西直館華棖萬瓦齊不有元臣躬異數

公詩序工曹
建蓋異數也

何由來者得安棲明裡高閣爐薰煖檢押

風光彩筆題媿我迂疎羈寓遠良宵往往負招攜

予寓
午門

之東每齋
宿率不與

貢院將揭榜借韻

五夜文光射斗寒穿楊破的若無難滄波龍起雷初震
碧海鵬搏宇正寬定有玄徵來夢裡好占喜色上眉端

曲江紅杏饒春色羨爾明朝走馬看

和亭谿宮詹院中賞蓮之什二首

若耶溪上賞心違玉署金塘喜共依
碧錦帳中簇西子翠雲堆裡擁真妃
亭亭白日風翻蓋冉冉青冥露濕衣
最是張衡多妙思清詞健筆一時揮

玉堂高譙羣公集為愛名花鎮日從
浪說若耶雲萬疊平分太液錦千重
莫教池上停歌板已判歸途聽暮鐘
清景情歡良不易賞心須為惜從容

和張玉谿宮詹齋居二首

玉堂虛寂稱齋居三日追陪笑語餘月上廣庭人未寢
星臨高棟夜何如風塵荏苒年華逝江海分違故舊疎
廿載馮唐猶是昔獨隨羣彥曳朝裾

此日清齋玉署居乾坤回首廿年餘我無術致玄丹就
君有詩吟白雪如花妥幽階香澹澹竹搖虛牖影舒舒
素衣緇盡長安土欲探蘭苕織翠裾

和玉谿齋夕感懷之什

官裡匆匆節序過又看春色上柔柯齋居自喜無塵雜
幽興時能寄嘯歌豈有涓埃裨聖化且同精被仰玄科
詞林濫竊逾三紀碌碌無聞雙鬢皤

和玉谿齋居懷坊館諸公

朝來喜色遍堯天聖主明禋契上玄且慰齋居共良夜
獨驚衰鬢又新年冥冥元化孚顓際穆穆仙真陟降前
伐木有懷人不寐一燈清焰對高眠

對雪和玉谿韻

綏綏縷縷舞長空淑氣氤氳不待風太乙降歆臨法會
天孫剪綳散瑤宮三農已見豐穰兆一德由來感格中
幸接夔龍沾聖澤更將歌頌萬方同

金山口望諸陵

野色朝開墟日晴衝寒踏凍作郊行地從西北岡巒擁
望直陵園雲霧生虎踞龍蟠天險壯河清海晏帝衢亨
萬年鴻寶如磐石不盡敷天頌禱情

和夏桂溪祈雪之作二首

禱雪宵辭禁苑西
貞符親覩御標題
古祠深院留明月
寶炬銀燈拂絳霓
北角芒垂寒斗近
中庭烏噪朔風淒
仰瞻一德孚顒若
欲和陽春意獨迷

祈靈恭向禁城西
天語親承御筆題
古鼎浮烟團小蓋
寶幡搖影颭脩霓
神君時至冷然語
雲物冬深颯以淒
三白即看歌瑞應
堯衢漢闕望中迷

奉詔閱庶吉士卷和介翁韻二首

閱士羣公我濫同
王言赫奕炳如虹
須知獨為儲賢地

要是無分入穀雄清廟豈容遺卞玉雲門合自識焦桐
庸愚廿載前叨與媿乏涓埃答睿衷

閣下羣賢角藝同彩毫揮染盡成虹先唐甲第皆稱雋
有宋宏詞獨擅雄寶氣一時呈匣劍太音千古寄絲桐
明時報稱慙無似薦士聊為竭寸衷

和桂洲閣老賜宴禮部記恩遇詩二首

春明南省息風埃帝勅高筵此日開並命趨陪聯八座
同依衮舄仰三台萬方民物資陶冶一代謨猷屬化裁

欲罄微忱讚休烈再歌白雪意悠哉

九載黃扉秉國鈞千年紫氣際昌辰衣冠總荷天家澤
省署遙連禁院春晴旭濃薰花草麗暖風細逐管絃新
極知此日酬恩志不負平生報主身

再疊二首

來玉亭邊冠蓋集五雲深處御筵開式從星履陪高會
快覩奎光燭上台鳳勅重宣頒異數麟袍新賜稱春裁
試披簡冊論遭際再咏明良仰盛哉

九重綸綍褒元宰三月鶯花屬令辰
華省高筵齊北斗大官仙醴注長春
鹽梅調劑臣工在日月光明聖德新
青史遠看千載事黃金擬鑄百年身

和玉谿賀桂老欽宴詩二首

南省春朝芳宴開湛恩傳自九天來
廟謨式仰多殊績台翰爭誇出妙裁
桓老漫言稽古學姚公曾擅濟時才
叨陪媿我何為者笑插宮花倚醉回

湛露曾聞宴鎬京茲晨春賞洽孤卿
元臣獨倚恩榮重

老我偏多感激生，拂坐篆烟浮瑞靄。
遏雲歌吹雜流鶯，無能紀述誇明盛。
郢曲傳來強為賡。

送許龍石之南少宰

金陵宮闕五雲生，銀漢蘭舟送子行。
南北曹分原並重，山川地勝有餘清。
官齋剪燭題春雨，鍾嶠支頤看晚晴。
舊學名高三十載，豈容旌節滯江城。

寄張陽峰大宗伯

悵望留都歲月淹，似公名德幾人兼。
即看鼎鉉裨元化，

暫與冠紳肅具瞻山寺春晴朝促駕蕭齋客去晝垂簾
舊時風月三千首聞道新來律更嚴

甘翁六十壽詩和乃弟几山司空韻二首

美人家住芙蓉國仙宅名堯雲霧窻洞口春遊花作陣
湖心晴泛水平江真詮錄授五千字瀛海籌輸三十雙
即向長安望南極壽星昨夜照西邦

文物衣冠見俊龐堂開壽域敞雲窻案供遙借支磯石
酒釀平添濯錦江洞裏花明春冉冉膝前萊舞玉雙雙

青城翠壁神仙窟名勝從來說此邦

清明日都人士俱為掃松之行兒子克弘告予
曰兒不隨父拜壠上三歲矣聞之愴然因述
以詩

紛紛士女出郊行處處晨報本情宦海一為鄉壠隔
天涯三見歲華更已孤祿養慙烏鳥未有涓埃答聖明
稚子有言吾忍聽不堪回首淚縱橫

送楊敬齋之官湖南二首

春日陰陰飛柳花潞河新水泛仙槎一官發軔恭承命

隔歲寧親喜過家好擬坡翁閒聽鶴

東坡赤壁即此

更尋陸子

試烹茶

郡有陸羽烹茶泉

莫嫌枳棘卑鸞翼萬里雲程正未涯

才賢楊子自儒珍不是稽勾簿領人廿載已孤錐脫穎
一官且喜職親民洞庭南下觀滄海衡嶽中宵望紫宸
見說梅山梅盛發可能遙贈一枝春

省中齋居

省樹沉沉山鳥鳴舞風飛絮撲檐楹輕雲澹靄日將午

茗盃爐薰神自清未有涓埃慙報塞且同齋戒薦精誠吾
皇聖德潛昭假寅直如臣懼曷勝

奉贈松臯太宰二首

鬱鬱喬柯手自栽秀分東嶽貌徂徠冰霜萬壑看凌厲
雲霧中天日往來造化獨私培養力明堂須倚棟梁材
睠言仰止森嚴地常藉清陰庇九垓

移來巨植自高嵩九仞重泉起蟄龍柱國已看充禹貢
名稱應不羨秦封貞姿向日心偏切香葉流雲影自重

勝地鍾靈無盡已更多材美繼前蹤

和戴龍山喜雨韻二首

朝來喜雨伏驕陽一念精禪契昊蒼沃澤共看沾四野
來牟已喜兆千箱不緣聖德昭靈貺詎有民和協至祥
仰止周文求治切更聞兢業每宵裳

穆穆嚴宸拱舜裳明明端揆燮陰陽仰瞻至德躬玄默
再覩卷阿詠治康道本箕疇孚禹化心誠湯禱致殷昌
小臣竊祿慙無補欲贊神功未易量

送花隆恩歸江陰

并序

江陰花隆恩妙於醫頃來都下適子病隆恩
治療良愈予德之其歸也賦此以贈

細雲斜日澹秋姿
路出都城策馬遲
久客任教塵染袂
到家猶見菊盈枝
青囊子有金嬰術
白首吾深舐犢私
見說重來猶未卜
不堪回首共淒其

送張遠之銀臺南歸

并序

遠之來訪其兄水南司成瀕行乞言賦此為贈

元方霄漢日承恩
季子關河又問津
原上鵲鴒偏獨苦
塵中野鶴故難馴
深山雪盛鏡黃獨
明月天空詠白蘋
莫為幽間遲驛使
帝鄉回首即長嘯

送胡子剛

并序

子剛來都下乞其先翁卹典洎蔭敘其歸也
借少湖韻賦一詩贈之

不為京塵易浣衣
榮親事了即思歸
已看地下昭先德
更念庭前色養非
移孝有階崇繼述
讀書無意羨輕肥

賢關即是圖南地萬里雲霄好奮飛

因送胡子頗動歸思借韻一首

宵夢山中薜荔衣朝來匹馬送將歸
子承家學惟忠孝我畏危途有是非
霜冷洞庭橙已熟月沉魚浦蟹初肥
茅堂夜雨秋堪聽望逐仙舟思欲飛

賀石門閣老得孫詩五首

鯉庭喜見重添玉綸閣開顏倍舊歡

公詩次舊生子韻

已見琴

書稱有託未容身世羨無官

公詩有琴書堪付故云

奇英試辨啼

聲異祿壽天教付畀完掌上明珠寧有價老懷一日幾
迴看

老桂孫枝並秀難茲歡應是異常歡共占素履孚天道
直擬書香繼祖官
名門德澤源流遠還有雲仍奕葉看

充間喜見重門闌此日庭除共一歡盛德從知應有後
老懷方始愜為官喬松元氣神明護仙果天家雨露完
賜笏賸教遺遠澤要留忠孝範模看

恭聞相府生孫日雜選朝紳喜助歡犀錢重製皆珍賜
湯餅頻調給大官召公世德勛賢近張老名賢頌禱完
公詩有堂構
苟完之語調燮餘閒聊灑翰陽春吟得遍傳看

老見佳孫心倍寬膝前令子足承歡黃扉介壽徵平格
綠野關情且耐官人莫與期天自定事無違願福方完
魏家勛烈稱千古留取聲華作對看

謝答端溪少宗伯詩

老去詩篇少興吟枯腸今復費搜尋况言樂裏時縈念

更是山林日上心佳句強賡愁險韵雅情久負積愆深
芝蘭幸接真慙晚冰雪相依繼自今

次韻贈答同年諸守谷

勛名雖足上凌烟藻翰于今爾擅賢不為風波當日裡
已看金紫十年前秋深古桂香逾遠歲晚喬松色更鮮
禁掖清華人共羨得兼吏隱即神仙

借韻述懷并呈守谷

達觀萬事等朝烟痛飲狂歌比較賢少日襟期青史裡

老來情事白鷗前
孤槎海上兼天遠
三秀山中浥露鮮
康世未能慚出世
欲傳真訣學神仙

場中勞瘁弗怡偶念守谷贈韻再疊六首

邯鄲夢裡一炊烟
勘破浮榮若箇賢
豪氣漸消華髮裏
草堂思構碧山前
黃塵擾擾日月暗
白雲英英顏色鮮
何當振衣從此去
騎鯨海上追羣仙

蟠龍隴上一犁烟
我慕樊生亦自賢
已結小堂依水曲
更栽脩竹傍窻前
天空萬里冥鴻遠
雨過千林橘柚鮮

寂歷九峰秋色裏
浩歌明月送飛仙

茫茫塵海渺雲烟
脫屣誰如疏傳賢
官跡久羈紅日下
鄉心已逐碧波前
太烹野蔞同堪飫
錦服荷衣各自鮮
不用廣成叅妙道
形神無累即真仙

一榻清虛裊篆烟
端居深媿昔時賢
終期黃髮青山裏
願托丹心白日前
出海蛟龍應自得
經霜松菊故能鮮
思玄欲繼張平賦
學道還從河上仙

江鄉冰月與雲烟
代有翛然避世賢
短楫子能乘遠興

老夫居住澱湖前，卧吹長笛魚龍起。
坐掬寒泉水荇鮮，怪底連宵幽意動。
夢騎黃鶴挾飛仙。

落落光陰莽莽烟，乾坤搔首幾英賢。
關河聯絡秋風裏，世事奔趨夕照前。
海上扶搖鵬路濶，山中幽雅蕨芽鮮。
悠悠吾道何終極，試向玄洲問列仙。

合川詩贈王侍御

二水源分駛碧流，雙龍蜿蜒滙滄洲。
即看涇渭從中瀉，並作波濤潤九州。
潮汐四時隨吐沒，乾坤萬古自沉浮。

塵蹤得似張騫興與爾乘槎汗漫遊

韓峯詩贈沈侍御

白下長干路窈深
亂雲堆裡拱欽岑
朝耕暮讀藏修地
春雨秋霜感慕心
勢接鍾山連岱嶽
氣蒸雲霧作商霖
名賢德澤遺芳在
千古昌黎可重尋

明遠樓次韻

有序

昨歲辛丑予以知貢舉入院嘗一登茲樓讀
陽翁詩匆匆欲和不果承乏之再復一寓目

念更不可無言漫賦三章以備欠事

徙倚層樓眺晚霞奎光午夜映文華薄寒猶見燕臺雪

初九日
微雪

微雨將催內苑花

十三日
小雨

雲氣盪胸扶日上鴈

行決皆度空斜萬年文運當茲會四海車書正一家

突兀高樓倚太霞重來登眺感年華泥融紫陌將飛燕
寒勒青林未着花閭闔九天當殿直笙歌萬井夾城斜
朱門畫戟將軍第瑤館琳宮羽士家

明遠樓頭詠碧霞關心節序屬昭華即看燕谷冰霜地

會賞春明爛漫花晝永苑雲縈檻細天空奎斗拂簷斜
都將化日氤氲氣散入閭閻百萬家

和許龍石山行四首

晚趨功德寺遇雨

馬蹄不為踏山忙王事幽懷興故長疎靄淡雲天杳杳
石林茆屋日荒荒翠華有夢連清夜野渡誰家繫小航
坐對明燈忽聞雨無邊爽氣入虛堂

過弘濟寺

佛印南來知幾傳香燈鐘鼓自年年僧如有約先張榻
事本非期亦是緣寶劍光搖紅日下白雲陰護翠微前
三生漫演無邊偈一勺還嘗石澗泉

宿碧雲寺

乍息肩輿日未沉名山曾此幾窺臨一泓寒沁泉流碧
萬折源通地脉深古洞無塵留暑氣虛窻有榻鎖秋陰
夢回忽聽鐘鳴寺出戶猶看月在林

早發

林開晨旭鳥鳴過望裡羣峰萬笏羅湛露澄濃浮沆瀣梵
宮雄峙壓盤陀佛能說法思超世我為耽詩未脫魔王
事有程還促駕一鞭須趁早凉多

秋興八首用馬西玄韻

金殿瑤壇御氣通雲旌羽蓋裊高空九天日月昭回裏
五嶽真仙陟降中禮樂三千姬孔教關河百二古今雄
詩人懇悃歌磐石英主訐謨詠大風

故相門前雀可羅沙堤新築擁鳴珂波澄太乙搖星斗

月冷昭陽長薜蘿絕檄羽書頻歲警敵天風雨入秋多
寒蛩堦下鳴聲急唧唧啾啾爾為何

幾向南邦仰北辰屬車無路從遊巡風雲幸接夔龍侶
虛薄真慙憔悴身多病少陵緣底病酖人叔子豈欺人
崎嶇世變江河下寂寞羈懷感慨頻

莽莽乾坤幾陸沉寥寥宇宙慨知音松筠不受冰霜妒
霄漢常懸鴻鵠心甲第笙歌穿窈窕邊城鼓角助陰森
節催節換頻驚速愁詠愁添轉更深

燕臺易水莽蕭條黃菊丹楓興獨饒漫措歸心淹歲月
空餘意氣薄雲霄高天露下千山肅大地風雄萬壑搖
翹首九重宮闕壯夜深突兀倚參寥

陸寶山浮萬木巔蒼藤茆屋鎖寒烟千年古迹藏靈氣
百道飛虹落澗泉往事消磨殘夢裡鄉心搖蕩五湖前
生平故舊多星散悵望音塵各一天

疎林蔓草夕陽西野菊江蘼吐艷齊萬里關河秋漸杳
五陵雲物望都迷邯鄲古道爭馳轂山徑幽人獨杖藜

處處寒衣急砧杵夜深敲斷更清淒

上郡漁陽百戰場頻年冤鬼哭殊方陰風短日雲連地
沙磧寒宵月照霜克敵可憑天幸數安邊惟藉廟謨長
杞憂藜藿懷三餌肉食公侯亨萬羊

謝翁見愚送酒用杜韻

幾度分來玉液春馳緘走馬遠勞人清曹了事多休暇
長日開尊每數巡已把鄉愁祛似掃獨無詩筆健如神
空瓶實少娛賓意餘瀝惟沾稚子唇

和大宗伯張陽峰賞蓮之什二首

清曹了事早休衙
喜接名公一賞花
倚困似憐多寂寞
向人如語故欹斜
漫斟翠管誇風味
更把瑤篇詠物華
勝會可教容易擲
城頭須待聽鳴笳

小院筵開暑氣微
殘芳猶喜對斜暉
人從忙裏時輕擲
花到秋來事便稀
泣露已看瑤實重
映空還藉翠雲圍
餘香惹得渾疑似
太液池頭採佩歸

和許龍石賞蓮之什

莫謂尋芳已後時猶堪一笑把瓊枝
醺華向日微薰臉殘馥隨風細入
卮太華峰頭誇異種若耶溪上負幽期
不須爛醉窮心賞靜對孤妍亦自奇

臘月十日鄉搢紳邀會宣城私第小詩紀事兼
述鄙懷二首

同朝鄉曲喜諸賢老我慙多一日先官裡
差池稀笑語侯門忽漫對高筵乾坤頗
仰懷千古萍梗遊從感百年雅會清時
良不易共將歡賞媚燈前

莫訝燈前笑語頻
祗緣鄉曲誼相親
衣冠幸際風雲會
祿仕誰非感激人
華月中天侵院竹
清歌午夜動梁塵
南鴻朔鴈為謀異
看取孱夫兩鬢銀

再疊前韻一贈少湖宗伯一述鄙懷

座有南州合讓賢
獨慙犬馬酌予先

少湖與予為客

即承高論

霏瓊屑共愛春風拂
繡筵官裡偶同休暇日
老懷欣遇中興年
留連雅會寒宵永
斷送清愁月色前

送酒傳歌莫厭頻
喜同清夜故鄉親
乾坤逆旅誰非客

歲月馳驅不待人海水有期歸大壑荷衣無處避浮塵
一塵願買青山住剩有君王舊賜銀

廿五日復會於宣城第用張白灘韻一首奉贈
地主

寒宵漏永燭花偏大府堂深甲帳連歌舞遊呈留院月
沉檀不斷裊爐烟盟存帶礪家承舊勲著旂常爵賜先
淇澳昔聞歌衛武緇衣今為頌公賢

夜酌宣城第再和白灘韻

燈前帽影坐來偏妙舞清歌喜接連
星動九天低拂戶
月臨萬井淡浮烟
持杯泛白吾嗟倦
對局探闔子合先
好客若非緣地主
欸懷寧得盡交賢



文簡集卷二十三